

दिनांक 25.03.2025

समय: 18.45 बजे

- बाड़मेर मांय आज राख्यी ज्या मातृ शक्ति वंदन कार्यक्रम सागे राजस्थान दिवस समारोह रा कार्यक्रमों री सुरुआत-मुख्यमंत्री भजनलाल शर्मा महिलावां सारु केई सौगातां दीनी।
- राज्यपाल हरिभाऊ बागडे सैर-सपाटा सागे कौशल विकास री जरूरत माथे जोर दीनो।
- प्रधानमंत्री नरेन्द्र मोदी कह्यो-भारत टी.बी. रे खिलाफ अभियान मांय ध्यानजोग प्रगति कीनी।
- प्रदेश मांय गर्मी रो असर और बध्यो-चिकित्सा मंत्री अहलकारां सागे मीटिंग कर र जरूरी व्यवस्थावां करण रा हुकम दीना।

000

म्हाणा बाड़मेर खबरनवीस बतायो के कार्यक्रम मांय मुख्यमंत्री महिलावां रा भला ऊं जुड़ी केई योजनावां री सुरुआत कीनी।

000

कार्यक्रम मांय उपमुख्यमंत्री दिया कुमारी अर महिला अर बाल विकास राज्यमंत्री मंजू बाघमार ई मौजूद रही। राजस्थान दिवस समारोह रा तैत राज्य मांय 31 मार्च ताई भांत-भांत रा कार्यक्रम राख्या जावेला। काल बीकानेर मांय किसान सम्मेलन व्हेला। ई मौके किसान उत्पादक संगठनां रो मेळो भरेला अर सब्सिडी रा तौर ऊं तीस हजार किसानां रा बैंक खातां मांय 137 करोड़ रुपया भेजा जावेला। दिल्ली रा बीकानेर हाउस मांय काल राजीविका मेळो सुरु व्हेला। इण मांय शिल्प मेळो अर फूड फेस्टिवल ई लगायो जावेला। राजस्थान दिवस 30 मार्च ने चैत महीना री उजाळी एकम रा दिन मणायो जावेला। ई दिन राजधानी जयपुर मांय खास सांस्कृतिक कार्यक्रम राख्यो जावेला। प्रदेश रा न्यारा-न्यारा जिलां मांय ई राजस्थान दिवस रा सिलसिला मांय भांत-भांत रा कार्यक्रम राख्या जा रह्या है। चूरु मांय राख्यी ज्या जिला स्तर रा महिला सम्मेलन मांय मोटी तादाद मांय महिलावां सिरकत कीनी। बारां, अजमेर, जयपुर अर पाली समेत केई जिलां मांय महिला सम्मेलन राख्यी ज्या। मुख्यमंत्री भजनलाल शर्मा राजस्थान दिवस ने उत्सव रा तौर ऊं मनावण री अपील कीनी है। वे जनता ऊं प्रदेश ने विकसित बनावण सारु सेवा अर समर्पण भाव सागे काम करण बाबत कह्यो।

000

राज्यपाल हरिभाऊ बागडे कौशल विकास माथे जोर देता थकां कह्यो है के मौजूदा दौर मांय पर्यटन अर कौशल विकास एके सागे चाले है। वे आज कोटा विश्वविद्यालय रा पहला औद्योगिक अकादमिक सम्मेलन मांय बोल रह्या हा। श्री बागडे कह्यो के सैर-सपाटो, नौकरी-धंधा अर माली विकास ऊं सीधो जुड्यो है। राज्यपाल कह्यो के नौजवानां ने पर्यटन उद्योग ऊं जोड़ र वां ने जरूरी कौशल दे र नौकरी-धंधा रा मौका बधाया जा सके है। वे होटल उद्योग, टूर गाइड, इको-टूरिज्म अर सांस्कृतिक पर्यटन ने बधावो देवण री जरूरत माथे जोर दीनो। राज्यपाल आज ही कोटा मांय राजस्थान तकनीकी विश्वविद्यालय रा दीक्षांत समारोह मांय ई सिरकत कीनी। वे 9 हजार 521 विद्यार्थियां ने डिग्रियां दीनी। वां सागे ई 36 शोधार्थियां ने पी.एच.डी. री उपाधियां दीरीजी।

000

नगरीय विकास मंत्री झाबर सिंह खर्वा कह्यो है के तकनीकी नवाचारां ऊं प्रदेश रो नगरीय विकास तेज व्हेला। वे आज जयपुर मांय मालवीय नेशनल इन्स्टीट्यूट ऑफ टेक्नोलॉजी-एमएनआईटी मांय इंजीनियरां री क्षमता मांय बधोतरी सारु राख्यी ज्या सिखावण कार्यक्रम रा उद्घाटन सत्र मांय बोल रह्या हा। ई मौके श्री खर्वा इंजीनियरां सागे बातचीत ई कीनी। कार्यशाला मांय तकनीकी मुद्दा अर निर्माण रा कामां ऊं जुड्या तकनीकी नवाचारां री सिखावण दीरीजी।

000

गृह राज्य मंत्री जवाहर सिंह बेढ़म अर राजस्थान धरोहर संरक्षण प्राधिकरण रा अध्यक्ष ओंकार सिंह लखावत आज भरतपुर मांय किला रा बिहारी जी मिन्दर अर कैला देवी मिन्दर हलका रो दौरों कीनो। वे भरतपुर मांय दूजी धार्मिक ठौड़ां रो ई दौरों कर र वां रा विकास अर वां ने और रुपाला बनावण री संभावनावां रा बारा मांय विचार कीनो। खबरनवीसां सागे बातचीत करता थकां श्री बेढ़म

कह्यो के ब्रज हलका मांय विकास अर वां ने और सुन्दर बणावण सारु डीपीआर तैयार करी जा रही है।

000

प्रधानमंत्री नरेन्द्र मोदी कह्यो है के भारत टी.बी. रे खिलाफ अभियान मांय ध्यानजोग प्रगति कीनी है। 100 दिन रा टी.बी. मुक्त भारत अभियान ऊं मिली खास जाणकारियां रा बारा मांय केंद्रीय स्वास्थ्य मंत्री जे.पी. नड्डा रो एक लेख साझा करता थकां प्रधानमंत्री कह्यो के ओ अभियान टी.बी. मुक्त भारत सारु मजबूत नींव रखी है। काल विश्व टी.बी. दिवस रे मौके एक लेख मांय श्री नड्डा कह्यो हो के भारत टी.बी. री बीमारी ने खत्म करण रा नजरिया ने ओजू परिभाषित कर रह्यो है।

000

बालोतरा जिला रा तिलवाड़ा मांय आज राज्य स्तर रो श्री मल्लीनाथ चैत्री पशु मेळो सुरु व्ह्यो। पशुपालन अर डेयरी मंत्री जोराराम कुमावत अर जिला कलेक्टर सुशील कुमार यादव झण्डो चढ़ा र रीत सागे मेळा री सुरुआत कीनी। ई मौके खबरनवीसां सागे बातचीत करता थकां पशुपालन मंत्री कह्यो के मेळा ने और बेहतर बणावण सारु सरकार और कोशिश कर रही है।

000

मल्लीनाथ पशु मेळो आठ अप्रैल ताई चालेला। इण मांय न्यारा-न्यारा राज्यां ऊं पशु-पालक अर कारोबारी पूग रह्या है।

000

देश मांय आवता पांच साल मांय दूध उत्पादन रो बूतो 239 मिलियन मीट्रिक टन ऊं बधा र 300 मिलियन मीट्रिक टन करणो तैय करी ज्यो है। केन्द्रीय पशुपालन अर डेयरी मंत्री, राजीव रंजन सिंह आज लोकसभा मांय आ जाणकारी दीनी। श्री सिंह बतायो के साल 2014 मांय सरकार कानी ऊं चलायी ज्या राष्ट्रीय गोकुल मिशन पाछे देश रा दूध उत्पादन मांय साढे तिरेसठ फीसदी री बधोतरी व्ही है। वे आवता तीन साल मांय दूध उत्पादन मांय 15 फीसदी री बधोतरी रो भरोसो जतायो। केन्द्रीय पशुपालन अर डेयरी मंत्री बतायो के देश मांय करीब 10 करोड़ लोग दूध उत्पादन रा काम मांय लाग्योड़ा है, ज्यां मांय तीन चौथाई महिलावां है।

000

नागौर जिला रा मुंदियाड़ गांव मांय करंट लाग जावण रे कारण तीन जणां री मौत रा मामला मांय राजस्थान मानवाधिकार आयोग नागौर रा जिला कलेक्टर अर एस.पी. समेत पांच अहलकारां ऊं जवाब तलब कीनो है। आयोग रा अध्यक्ष जस्टिस जी.आर. मूलचन्दानी नागौर रा डी.एम., एस.पी., विद्युत वितरण निगम रा एस.ई., खीवसर रा एस.डी.एम. अर डिस्कॉम रा प्रवर अर अवर इंजीनियर ने नोटिस जारी करण रा हुकम दीना है। ई सागे ई जिला कलेक्टर ने मरण वाळा तीन्यू जणां रा पिरवार वाळां ने समुचित विधायी क्षतिपूर्ति राशि बिना मोड़ो कर्या देवण बाबत् ई कह्यो। ई मामला मांय आयोग अब 22 अप्रैल ने सुणवाई करेला।

000

प्रदेश मांय गर्मी रो असर लगातार बध रह्यो है। प्रदेश रा घणखर हलकां मांय ऊंचो ऊं ऊंचो तापमान सामान्य ऊं 3 ऊं 5 डिग्री सेल्सियस ताई बत्तो दर्ज कर्यो जा रह्यो है। आज बाड़मेर, जोधपुर, जालौर अर आरे-सारे रा हलकां मांय कठे-कठे अधिकतम तापमान 40 डिग्री सेल्सियस ने पार कर ग्यो। लारली रात बाड़मेर, फलौदी, जैसलमेर, बीकानेर अर डूंगरपुर मांय रात री बगत ई पारो 20 डिग्री सेल्सियस ऊं ऊंचो दर्ज करी ज्यो। मौसम केन्द्र जयपुर रा निदेशक राधेश्याम शर्मा बतायो के आवता 48 घंटा मांय राज्य रा कुछ हलकां मांय तेज बायरो बाजण अर थोड़ा-घणा बादळा मण्ड्या रेहवण रा आसार है।

000

ई बीचे, चिकित्सा मंत्री गजेन्द्र सिंह खीवसर स्वास्थ्य विभाग रा अहलकारां ने उनाळा ने ध्यान राखता थकां प्रदेश रा अस्पतालां मांय जांच, दवाई अर ईलाज रा पुख्ता प्रबंध करण रा हुकम दीना। वे कह्यो के सब सेंटर ऊं जिला अस्पताल ताई अर मेडिकल कॉलेजां ऊं जुड़्या अस्पतालां मांय दवाइयां अर ईलाज री व्यवस्थावां मांय कोई कमी नी राखी जावणी चाहिजे। श्री खीवसर कह्यो के मौसमी बीमारियां ऊं बचाव सारु टेम-सर जरूरी जतन कर्या जावणा चाहिजे। मंत्री सगळा अस्पतालां मांय वाटर कूलर, ए.सी. अर पंखा री उपलब्धता तैय करण बाबत् ई कह्यो।

000

चैती नौरता राममेळा रे दौरान जातरूआं री हिफाजत अर ज़रूरी व्यवस्थावां तैय करण सारू जयपुर रा आमेर किला रा शिला माता मिंदर अर आमेर महल मांय खास प्रबंध करी ज्या है। आमेर महल रा अधीक्षक राकेश छोलक बतायो के 29 मार्च ऊं 8 अप्रैल तांई आमेर महल मांय हाथी री सवारी नी करी जा सकेला। आमेर महल सैलाणियां सारू संवारे 8 ऊं सिंज्यां साढे पांच बज्यां तांई ही खुल्यो रेहवेला।